

三原縣新志

利

新志
三原縣
利

PDG

三原縣新志卷之六

知縣焦雲龍重修

邑人賀瑞麟編纂

人物志第六中

賢能
隱逸

理學
孝義

文學
壽民

志士
方伎

質行

賢能八十四人新增五人

漢吉黃三國志常林傳注茂同產兄爲長陵令是時科禁長吏擅去官而黃門司徒趙溫薨自以爲故吏違科奔喪爲司隸鍾繇所收

南宋吉翰南史本傳字休文初爲龍驤將軍劉道憐參軍隨府轉征虜左軍參軍隨道憐北征廣固賜爵建城縣五等侯參宋武帝中軍軍事臨淮太守復爲道憐驃騎中兵參軍從事中郎爲將佐十餘年清謹勤正甚爲武帝所知賞元嘉中歷位梁南秦二州刺史徙益州刺史加督在任著美績甚得方伯之體累

遷徐州刺史假節監徐兗二州豫州梁郡諸軍事時有死罪囚典籤欲活之因收典籤付獄殺之原此囚生命自下畏服莫敢犯禁卒於官

唐韓仲良瑗父也唐書瑗傳武德初與定律令建言周律其屬三千秦漢後約爲五百依古則繁請從寬簡以示維新於是採開皇律宜於時者定之終刑部尙書

路嗣恭唐書本傳字懿範始名劍客以世蔭爲鄴尉席豫黜陟河朔表爲蕭關令連徙神烏姑臧二縣考績爲天下最明皇以爲可嗣漢魯恭因賜名云轉渭南令主杜化東陽二驛時關畿用兵使人保道嗣恭儲具有素而民不擾後爲郭子儀朔方節度留後大將孫守亮驕蹇不受制嗣恭因稱疾守亮至卽殺之一軍皆震永泰三年檢校刑部尙書知省事出爲江西觀察使

以善治財賦稱大歷八年嶺南將哥舒晃殺節度使五嶺大擾
詔嗣恭兼嶺南節度使嗣恭募勇敢士八千人由開道出不意
斬晃及支黨萬餘俚洞魁宿爲惡者皆族夷之拜東都留守卒
應嗣恭長子恭傳字從眾初蔭著作郎貞元間出爲虔州刺史
詔嗣父封鑿贛石梗嶮以通舟道德宗時李泌得君帝嘗曰誰
與君有恩者朕能報之泌言嗣恭子應臣常愧其長者思有以
報之帝曰善卽日加檢校屯田郎中服金紫累遷宣歙池觀察
使封襄陽郡王李錡反應發鄉兵救湖常二州錡不能拔元和
六年授左散騎常侍卒諡曰靖

恕嗣恭次子恭傳字體仁從嗣恭討哥舒晃授檢校工部員外
郎得從便宜擢降將伊愼用之賊平恕功多累遷鄜坊宣歙觀
察使以右散騎常侍致仕卒贈洪州都督

李令問靖孫也靖傳元帝爲臨淮王時雅與舊及卽位以協贊功遷殿中少監豫誅竇懷貞封宋國公進散騎常侍知尙食事恩待甚渥然未嘗輒干政後坐其子與回紇部酋承宗連婚貶撫州別駕卒

李彥芳靖五代孫靖傳太和中爲鳳翔司隸參軍家故藏高祖太宗賜靖詔數函上之皆太宗手墨文宗愛之不廢手其舊物悉留禁中又敕摹詔本還賜彥芳并束帛衣服權德輿嘗讀太宗手詔至流涕曰君臣之際乃爾耶

元竇復初歐陽元竇氏族譜序燕竇之裔內翰儀之派也爲人清慎簡諒德器深厚縉紳閒以公輔期之嘗被選爲京少尹稍遷京大尹有惠政於燕燕人德之拜中書參議

郝佑天挺子也挺傳字君輔小字朶魯別台由宿衛補官仁宗

時拜殿中侍御史以正直著名大受知遇遷陝西行省參知政事拜陝西行御史臺侍御史

張儼明志字克禮由憲史任御史臺照磨歷雲南肅政廉訪使僉事屢遷浙江中書省左右司郎中所至著能聲

明杜棠谿田通志字善政儀度豐偉剛毅寡和博物洽聞尤善星遁風角之術由鄉薦任眞定通判靖遠伯王驥征麓川從征有功賊平擢兵部職方郎中參贊戎政復調南京戶部所在得大體南部堂後樹忽冬花眾譽其瑞棠正色曰冬花春秋書異何瑞之有其剛正類如此性至孝母喪廬墓後爲雲南知府政績著聞致仕進三品卒年八十一

申春明志字時孟永樂中舉人授御史性孝友官二十年居憂省祭凡三至家致哀盡禮嘗按廣西山西所至有聲遷雲南激

江府知府卒於官

張鶴徵曾孫明志字九皋天資英敏襟度軒豁永樂中領鄉薦授行在戶部主事遷南京戶部員外郎景泰初知順德府歷任三載政平訟理致仕歸卒

梁澤谿田通志字汝霖家貧爲縣書公牘知縣莫謙奇其書遣入學舉成化戊子省元己丑登進士以庶吉士改御史巡按貴州山東所至左試諸生右斷疑獄剖決如流彈劾不避權貴貪污吏多解綬去爲怨家所奏謫茶陵令改華容值歲饑民賴其賑陞汝甯同知決疑伸冤擢懷慶知府禁戢鄭府軍校一郡凜然遷遼東苑馬寺卿浙江右參政總督糧儲所至除弊便民

張顒谿田通志字有孚通尙書永樂戊子舉人孝友有鄉行早與靖川馬尙賓爲友朝夕講學所得深純任四川慶符知縣公

廉爲民所戴

雒守一谿田通志字執中博學剛方莊重守禮宣德壬子鄉舉授廣昌壺關二邑訓導蔚州學正所至勤於訓誨俸廩外一不屑受歸休家貧養殮不給罔事干謁終日僵臥而已子光溥字文淵廩膳生善書工詩與馬雲岩爲吟社友學士大夫無不以科第元魁期之士卒婦女咸知其名相詬者必曰汝是雒光溥然竟不第

申瓊通志字廷瓚天順己卯舉人任山東蒙陰令嘗集古昔孝順事實爲民講解又督治農器以溥耕鑿之利教養兼舉蒙人繪象祀之今按著有孝順事實

李濟節孫也谿田通志字傳舟宏治中拔貢入太學任芮城簿剛毅練達因民爲治九載轉本縣丞又九載芮人奏陞本縣知

縣改臨潁老少涕泣遮留時臨潁告訐風熾有頑民十餘氏脇制官長濟至悉下獄繩之法刁風頓息釐弊振弱諸廢俱起時許州守邵二泉行社倉法惟濟如式積貯萬斛後以疾歸囊篋蕭然溫自知志料濟在臨潁時拔任姓於門役中教之後任方面培植賈姓寒士後入相

李伸谿田通志字道甫善博誦少得後卒業王康僖乃究理務約宏治壬戌進士授臨汾知縣晉王府軍校肆橫殺人前令莫敢治伸至悉寘之法境內肅然擢御史巡紫荊等關時礦賊千餘作亂伸執首惡餘黨解散巡按江西激揚得體正德中守嘉興有巨室吞人產爲郡害伸廉得立定爰書有殺兄謀奪其官者獄久不決伸一訊而服民咸稱快歷四川副使初庭訓甚嚴故其學行政理多有可觀在江西時以王陽明爲友自謂深得

其學云

秦偉谿田通志字世觀爲諸生時與谿田講誠敬之學後遊太學偕谿田及呂涇野張西渠崔後渠馬柳泉寇涂水相約講學所得益遂登宏治乙丑進士授戶部主事督宣大邊餉監軍張永欲賞所私偉弗與永竟沮其事出守保定有中貴占民田廬偉執奏不法狀繫罪中貴斂跡遷山西參政令行禁止民但知有秦參政不知有撫按也分守平陽獄訟者爭歸之爲巡按所忌交劾以去今按著有西澗詩集

穆相谿田通志字伯寅正德辛巳進士授沂水知縣邑經兵燹民多流亡寬代輸及不急之征歸業者三千餘人刊藍田呂氏鄉約以禮化民兩遇大盜降之歲饑煮粥給食疾者藥之所活甚眾擢浙江道御史巡視東城權貴斂手敕巡三關築隘口四

百五十七置器械三萬餘斷囚八百餘案巡按山西開沁水以通溝洫又疏清源太原渠招降青羊山巨盜復巡江西以勞成疾卒今按著有周易引蒙四書說義浮山奏稿巡歷行稿治沂錄

王承祥端毅公第四子也來儼然撰墓碑字天瑞由舉人爲順天府倅憂去起補理民事再請告去起補理馬政濬河均賦考牧蕃盛擢都察院經歷以都御史薦遷貴州參議單車就道不以家隨未幾分守山西冀南覈賦役嚴防守禁左道悉當時要務再移河東駐蒲州伐巨石衛城以免黃河冲齧大盜誣朝邑良家獄且成極辨釋之或曰朝邑公鄉也甯不避嫌曰吾知有法耳曷知其他襄垣有兄弟俱顯貴者僭擬非倫門樹五楹綽楔命撤其二中貴守潼關數以私干皆拒不納中貴思所以中

之然無可中也意沮而罷在晉十年聲籍甚會襄垣顯貴方用事遂罷歸

馬文玘谿田通志字玉之文雅莊謹任潁州訓導每黎明坐齋中課諸生業日入而退寒暑弗輟潁士興起多成名歐陽永叔裔之在潁聞其貧訪而周之遷甯晉教諭甯有二生久病或謂宜申御史黜名文玘弗聽惟調護之後瘳咸通籍故其卒於官也弟子悉哀奠悲思焉

趙瀛通志字文海嘉靖己丑進士章邱知縣歲饑賑濟全活甚眾除兇緝盜以治行擢戶部郎出知嘉興府疏濬城河以其土運之南湖建煙雨樓時田多逋糧吏緣爲奸乃分田地山蕩二則賦額均平迄今賴之兵備易州多著邊功遷山東參政歸里囊篋蕭然今按著有小學史斷

皆如思李志字子學嘉靖中進士洪洞知縣寬徭省刑弔疾苦
除積蠹後補章邱治績更茂擢御史分宜當權不附歸里今按
著有吏隱堂集

任舜臣谿田通志字承華年十三爲諸生學官遣令就馬谿田
學授之經輒解正德辛未進士選給事中疏將上有忌者遂改
授長洲知縣在官廉明有聲爲縣丞所污乃懷恨成疾人咸惜
之

雒遵道溫自知志料嘉靖王子舉人諸城知縣諸故東南巨鎮
賦繁役重俗囂民頑一以不擾治之邑患盜計擒盜魁朱虎境
內帖然律身茹蘖飲冰一無所取邱月林負海內人望不輕許
可乃以廉靜寡欲稱之後移肥城一如治諸

焦珖谿田通志字廷玉性巧嗜學志存忠義尤善書札由貢生

任鄢陵知縣勸課農桑均徭省刑有惠政陞順天推官獄無冤
滯致仕終於家

來聘李志字安國嘉靖中進士以行人擢御史值朝廷議大禮
受廷杖左遷丹陵知縣近邑虎啞人聘爲文告神虎伏就捕邑
人異之謂不啻昌黎驅鱷魚也歷官四川按察使今按著有雲
峯近稿

趙應元吳中行撰家傳字文宗涇陽人由三原籍登進士授華
陽知縣次補郊縣奏績擢御史巡按湖廣張江陵柄國會有人
貪肆不檢法當罷以恃江陵爲奧援莫敢誰何應元首論之去
江陵銜之江陵假歸葬應元竣事還朝遇諸塗江陵私語曰先
人事當借重應元正色曰御史以復命行無迴事反境之理輒
謝去江陵益銜之行次汝南引疾乞休臺長希江陵指劾有所

託而規避削秩歸里江陵敗詔起言事復以伉直不善脂韋故
迢翔偃蹇始得遷南京大理寺丞命甫下而卒

胡汝安溫自知志料字恭甫由進士授大理評事歷陞左寺正
多所平反遷長沙府沿江修港以泊商船多方化導以息健訟
河泊大使王繼被陷於王奇者四年而昭晰一旦罷吏劉易強
占他人墳論罪還主豪民陳愚因均地魘死州官監生皮乙乾
因謀姦踢殺孀母廣賄隱情諸莫能決者獨能決之上官薦揚
入覲至衛輝聞父疾歸有懷故隙者嫉南道論之遂罷尤孝事
後母友於兄弟今按著有晴山集及樂府

李士達通志字伯順萬厯甲戌進士中牟知縣闢荒招流築隄
鑿河奏最擢南京江西道御史疏發奸黨忤張江陵出爲四川
僉事天全黎州永甯三土司亂平之遷敘州參議征叛賊有功

歷官山西布政使時番酋叵測朝議綬服改四川布政使管川東事單騎申命感受約束以艱歸遂不復出

王紹先通志字伯生咸甯人三原籍萬厯癸未進士工部主事監修潞王府省費巨萬忤奸璫陷之詔獄尋謫山東運判後主昌平糧儲糾劾奸璫再謫代州同知稍復南刑部員外郎歸閉戶讀書修輯陝乘

來儼然通志字望之萬厯乙未進士太和知縣躬行阡陌勸課農桑孝弟力田者表其閭戒飭士子蒸蒸向化期月邑大治移壽春尋調曲周直指爲上章請曰令固訟不罰鍰賦不染一文者也願無調因復任太和擢兵部職方司主事今按著有自愉堂集

王之鼎李志字玉鉉萬厯中舉人文安知縣潔已奉公以循良

擢工部主事出守夔州請減夔關稅務以甦商困時流寇猖獗多由秦入蜀議者欲盡誅秦人之商蜀地者鼎白直指驗明親給路引互七日夜全活數萬人

劉士璉通志字翼明萬歷庚子舉人父輔平績學力行以明經老璉少事繼母至孝天啓中擢司刑魏璫專恣璉獨抗拒不附崇正八年兵備達州有巨惡爲民害立斃杖下人快之流寇圍成都官民無策璉總理八門設法阨守危城以全敍首功晉本省方伯

周仕李志字汝信萬曆中進士鍾祥知縣力拒強璫歷兵部郎屢遷河南左韓所至有聲歸之日環堵蕭然

秦一鵬李志字搏所萬曆中進士南兵部武選司主事遷郎中兵備濟南尋參議河南復兵備曹濮值妖蓮作亂熄其黨地方